

**MENABE**

**Voasolo ilay DREN nampidirina am-ponja**

Voasolo amin'izao fotoana ilay talem-paritry ny fanabeazam-pirenena, na DREN nampidirina am-ponja tany amin'ny faritra Menabe. Nandray ny andrakiny ny talem-paritra vaovao. Raha tsiahivina dia nampidirina am-ponja vonjimaika ny talem-paritry ny fanabeazam-pirenena Menabe teo aloha, izay sady mpitarika ny antoko TGV ato Menabe notendren'ny sekretera nasionalin'ny antoko Tinoka Roberto. Rehefa nahavoaray fitorohana ny teo anivon'ny Bianco Morondava mikasika ny fanodinkodinambola : frais médicaux sy ordre de route, izay nataon'ny talem-paritra sy ny ralahiny, ka niroso tamin'ny fanadihadiana ny Bianco Morondava, voaporofa fa nisy ny fanodinkodinambola, sy fanararaotana amin'ny andraikitra ary fanaovana hosoka sy fampiasana hosoka, ka natolotra ny mpitsara mpanao famotorana izy mirahalaha talem-paritra sy ny comptable ary ny mpitsabo iray izay noraisin'ny Bianco ho mpiray tsikombakomba. Nahazo fahafahana vonjimaika



*Ny Dren vaovao any Menabe (faha-2 avy ankavia).*

moa ilay mpitsabo raha nampidirina amponja vonjimaika miandry ny fitsarana azy kosa ny talem-paritra sy ny comptable ny Dren Menabe, ka détournement des fonds sy abus de fonctions ary faux et usage de faux no vesatra hanenjehana azy rehefa natolotra teo anatrehan'ny fitsarana. Niezaka nitady hirika sy lalana namoahana ity talem-paritra ity ireo talem-paritra vitsivitsy namany, ka nametraka ny atao hoe solidarité ho an'ireo talem-paritra, nisy ny fandalovana indroa miantoana tao amin'ny lehiben'ny fampanoavana Morondava sy ny mpitsara izay

miandraikitra ity raharaha ity, saingy tsy nampiova ny hevitra ny fitsarana izany, ka iray volana taty aoriana dia izao voatendry izao ny talemparitry vaovao, misolo azy. Ny zoma lasa teo no nandray ny asa aman'andraikiny andriamatoa Ravelonomenjanahary Dieu Donné, talem-paritra vaovao. Ny Prefet an'i Morondava no nitarika ny fotoana, notronin'ireo mpiara-miasa eo amin'ny fitaleavam-paritry ny fanabeazam-pirenena ato Menabe sy ireo Ben'ny tanàna vitsivitsy ato Menabe. Notsindrian' Andriamatoa Rafidison Fidel Préfét an'i Morondava, fa tokony hiray hina

ny mpampianatra saingy amin'ny tsara fa tsy amin'ny ratsy ; nilaza kosa ny talem-paritra vaovao fa tonga hanompo izy, fa tsy ho tompoina ary vonona amin'ny heriny rehetra na atoandro na alina ho an'ny fanatsarana sy fampandrosoana ny fampianarana ato Menabe ary misokatra amin'ny rehetra ary mampitandrina koa izy ho an'ireo zatra ny lalan-dririnina fa tsy handefitra. Tonga nanotrona sy nanome voninahitra ny lanonana sady nisolo tena ny minisitra ny Directeur de l'éducation de masse et de civisme Andriamatoa Filongoa Manapoke Judith, izay zanaky ny faritra Menabe, niara voatendry tamin'ity talemparitry vaovao ity. Talohan'ny nahavoatendry azy izao dia lehiben'ny fari-piadiam-pampianarana tao Miandrivazo ny DREN vaovao, niditra amponja noho ny fanodinkodinambola tao amin'ny Cisco Miandrivazo koa no nosoloany toerana dia izao izy voatendry nisolo ny talem-paritra nampidirina amponja izao indray ihany koa eto Morondava.

**Rajepa**

**Faritra Menabe**

**Miseho lany ny herisetra sy fanararaotana ara-nofa**

Miseho lany amin'izao fotoana ny herisetra sy fanararaotana ara-nofa, na harcèlement sexuel any amin'ny faritra Menabe. Maro ireo vehivavy mitaraina, fa ianjadian'ny harcèlement ary tsy mifidy sokajin-taona izany fa maro ireo ianjadiany ary miseho amin'ny endriny maro. Tranga vitsivitsy no hita ka niroso tamin'ny fanadihadiana ny mpanao gazety, nandritr'izany no nahalalana fa maro ireo tovovavy vao mitady asa no trantran'izany harcèlement na herisetra sy fanararaotana ara-nofa izany ary saika mitovy avokoa ny fomba fanaon'ireo mpanararaotra. Milaza izy fa mahita asa ka omeny fotoana ireo tovovavy hoe entina amin'ny mpampiasa, ka rehefa tonga dia lazainy fa mbola tsy ao ny tompon'andraikitra dia eo izy no mampiditra ny resaka ka tsoriny fa raha miara- matory aminy dia tonga dia voaray ary tsy maintsy voaray, satria milaza manana fifandraisana amin'ny tompon'orin'asa ilay mpanararaotra ary ireo trano fivarotana sy trano fandraisambahiny no ataon'ireo tsy matahotody fitaovana amin'izany, izay tsy mitady mpiasa akory anefa ; ary tsy vitan'ny eo

amin'ny sehatra tsy miankina irery ihany anefa izany, fa efa tafiditra eo amin'ny asam-panjakana ihany koa izany, fa ny fisehony no tsy mitovy, satria eo amin'ny asam-panjakana dia ireo mpiasam-bola tsy voaray mpiasam-panjakana no ararotin'ireo tomponandraikitra, ka lazainy fa raha miaraka aminy dia karakainy ho voaray mpiasam-panjakana, saingy indriny fa ny vatan'ireo vehivavy fotsiny no voaviravira fa ny omaly tsy miova ihany ny toerana misy azy, fa dia miandry fampiantenana lava ary raha niresaka nifanovanana tamin'izy ireo dia tsy sahy miverin-dalana intsony izy ireo, fa sao ho very asa, ny sasany lasa mampirafy satria na dia efa manambady ary dia mbola miharitra miandry ny vokatry ny fifanarahana izay nampiantenainy azy. Misy koa ireo tompon'andsraikitra eo amin'ny asam-panjakana no manao io fomba mamohelina io, ka rahonany ho afindra any amin'ny toerana ambanivohitra be sy tsy milamina ireo vehivavy eo ambany fifehezany raha tsy manaiiky miray ara-nofa aminy; ao ireo rahonany ho roahana raha tsy manaiiky ny filan-

dratsiny . Tsy sahy mitovy izy ireo satria matahotra hoe izy indray no ho afa-baraka sy ho very asa, satria dia mirehareha ireo mpanao ratsy, fa izy no lehibe ka izy no ho to teny . Ireo trano fivarotana na trano fandraisambahiny voatonontona koa tsy sahy mitovy sy mitondra fanazavana satria tsy mpiasa ao aminy ireo mpanao ratsy ary misafidy ny hangina izy ireo, fa tsy tiany ho voatonona hoe ny toeram-piasany hoy ireo tompon'andraikitra izay nanaovana fanadihadiana no voaresaka. Raha eo amin'ny sehatry ny asam-panjakana indray kosa dia misy ny sampan-draharaha izay efa malaza amin'ity resaka harcèlement sexuel ity, fa tsy misy sahy mitoroka ireo mpiasa satria ny lehibeny no tompon'ny fanararaotana. Ireo tompon'andraiki-panjakana tokony handray andraikitra kosa dia toa zavatra hafa no manahirana azy dia manao mody tsy mahalala ary raha ny fanadihadiana natao teny amin'ireny tompon'andraikitra ireny dia milaza izy ireo, fa tsy mbola nahavoaray fitarainana, ao kosa anefa ireo efa nahazo fitarainana fa tsy sahy mandray andraikitra satria tom-

pon'andraikitra ambony noho izy ireo ilay mpanao harcèlement ka matahotra ny lehibeny izy ireo . Tsy vitan'izany ihany fa eo koa ny filalaovan'ireo tompon'andraikitra saony ireo zaza tsy ampy taona izy efa tsy miafina intsony ny sasany, raha ity farany ity indray no jerena dia goragora ny fanaraha-maso amin'ireny trano fandraisambahiny ireny, ka samy manao izay tiany na ny mpanam-bola na ireo tomponandraikitra. Ireo ray aman-drenin'ireo zaza kosa milaza fa sahirana ka zara aza misy mila ( misy miaraka ) amin'ny zanany, hany ka tsy hitan'ireo tompon'andraikitra izay te hijoro hampihatra lalana ny ataony, satria tsy misy vahaolana azony aroso manoloana ny fahasahiranana'ireo ray aman-dreny. Koa miantso ireo tompon'andraikitra mahefa, indrindra fa ireo mitonona ho mpiaro ny zon'ny mpiasa sy ny vehivavy, fa loza mitatao ato Menabe ity resaka harcèlement na herisetra sy fanararaotana ara-nofa ity. Miantso ny Bianco hankatra fanadihadiana lalina amin'ireo vehivavy mpiasam-panjakana ireny, fa maro amin'izy ireny no anjakan'ny kolikoly ara-nofa.

**Rajepa**

**Fenêtre FIFA Maroc 2023**

**I Coach Rôro ihany no hitondra ny Barea**

I Coach Rôro ihany, no voatendry vonjimaika hitondra ny Barea, hiatrika ny fifaninanana ara-pirahalalana hanomanantena hiatrehana ny « éliminatoires de la Coupe du Monde 2026 », hanomboka amin'ny volana novambra ho avy izao, sy ny « CAN Total Energies – Côte d'Ivoire 2023 », ao anatin'ilay hetsika « Fenêtre FIFA Maroc 2023 ». Izany dia hotanterahina amin'ny alatsinainy 9 ka hatramin'ny talata 17 oktobra 2023 ho avy izao, ka hifandrinany amin'ny ekipam-pirenena Mauritania sy Bénin. Araka ny vaovao azo dia tsy ho ela dia hampahafantariny mpanazatra ity ireo mpilalao handrafitra ny Barea hiatrika an'izany hetsika izany.

**Rainilita**



*Coach Rôro.*

**Komity Mpanatanteraky ny FMF Kandidà 48 no hifidianana mpikambana 10**

Kandidà miisa 48 tamin'ireo 54 nisoratra anarana, no hifidianana mpikambana 10 vaovaon'ny komity mpanatanteraky ny FMF, amin'ny fifidianana hatao miaraka amin'izay ho filohan'ity rafitra ity, hatao eto Antananarivo amin'ny 14 oktobra 2023 ho avy izao. Maromaro ihany ireo mpikambana teo aloha niverina ho fidiana indray ho ao amin'ity CE- FMF ity toa an-dry Andriatsimialona Sandrine Michèle, Lay Mein Alexandre, Razafimamonjy Jocelyn Alberto, ka tafiditra ao anatin'io lisitra io izay efa nivoaka tamin'ny fomba ofisialy ankehitriny. Nisongadina kosa ireto anarana kandidà somary efa fantampantaty ny maro ihany saingy misehatra any amin'ny zavatra hafa toa an-dry Ramantanisoa Harilala, Pisal Hamida Patrick, Rakotoarimino Andrianina Désiré, Dimasy Paul, Ramisamanana Lovaniriana, Ramiamanana Joseph ary Randrianirina Jean Ignace .

**Rainilita**

**Rugby 1/2-famaranana XXL Top 20, 2023 Feno hipoka tanteraka indray ny kianjan'i Makis**

Feno hipoka tanteraka indray, ny kianjan'i Makis Andohatapenaka, tamin'ny alahady 02 oktobra 2023 teo, tamin'ny fanatanterahana an'ireo lalao rugby ankatoky ny famaranan'ny fifaninanana « XXL Top 20, 2023 », sy ny « Championnat de Madagascar Fédérale 2 » . Teo amin'ny « Championnat de Madagascar Fédérale 2 » nanomboka ny hetsika tamin'ny alahady teo dia toy izao ny vokatry azo : 3F5 26 – 23 Ftam, Rosa Club de l'Imerina 17 – 43 Crai. Teo amin'ny fifaninanana « 1/2-Famaranana XXL Top 20, 2023 » kosa dia ny ekipan'ny Ftm Manjakaray no voalohany tafita hiatrika ny lalao famaranana rehefa nandavo ny ekipan'ny ekipan'ny Uscar Commune nifanandrindra taminy, tamin'ny isa 35 noho 26. Rava tsy lera kosa ny lalao faharoa nifanandrinan'ny Cosfa Miarabila sy ny 3Fb Fahasalamana, rehefa tsy nety nilalao intsony ity farany noho ny fahazoan'izy ireo karatra mena roa be izao. Marihana fa efa nitarika an'isa 22 noho 13 ny Cosfa tamin'izay fotoana izay.

**Rainilita**